

Jualan borong, runcit meningkat pada Mei

Perdagangan borong dan runcit Malaysia mencatatkan nilai jualan bulanan berjumlah RM147.9 bilion, berkembang 7.1 peratus tahun ke tahun pada Mei 2024, demikian menurut Jabatan Perangkaan Malaysia (DOSM).

Ketua Perangkawan Malaysia, Datuk Seri Dr Mohd Uzir Mahidin, berkata peningkatan sebanyak 7.1 peratus tahun ke tahun bagi perdagangan borong dan runcit pada Mei dipacu oleh subsektor perdagangan runcit yang meningkat 8.7 peratus atau RM5.1 bilion kepada RM64 bilion.

“Perdagangan borong juga bertumbuh 4.7 peratus atau RM2.9 bilion kepada RM65.1 bilion, diikuti oleh kenderaan bermotor

dengan peningkatan 10.5 peratus atau RM1.8 bilion untuk mencapai RM18.8 bilion,” katanya dalam satu kenyataan dikeluarkan oleh DOSM, semalam.

Bagi perbandingan bulanan, Mohd Uzir berkata, perdagangan borong dan runcit naik 2.0 peratus berbanding bulan sebelumnya, disokong oleh kenderaan bermotor dan perdagangan borong masing-masing dengan 8.8 peratus dan 2.0 peratus.

Beralih kepada prestasi mengikut subsektor, Ketua Perangkawan memaklumkan, pertumbuhan 8.7 peratus tahun ke tahun bagi perdagangan runcit disumbangkan oleh jualan runcit di kedai bukan pengkhususan yang

tumbuh 10.7 peratus atau RM2.4 bilion kepada RM24.9 bilion.

Katanya, kumpulan lain dalam subsektor ini turut merekodkan pertumbuhan positif iaitu jualan runcit di kedai pengkhususan (12.8 peratus), jualan runcit bahan api kenderaan (8.1 peratus), jualan runcit barangan isi rumah (5.3 peratus), jualan runcit makanan, minuman & tembakau (9.6 peratus), jualan runcit barangan kesenian & rekreasi (3.4 peratus), jualan runcit bukan di kedai, gerai atau pasar (8.0 peratus) dan jualan runcit di gerai & pasar (5.9 peratus).

“Bagi perbandingan bulan ke bulan, jualan subsektor ini meningkat 0.3 peratus, disokong oleh jualan runcit di kedai bukan peng-

khususan (0.9 peratus), jualan runcit bahan api kenderaan (0.6 peratus) dan jualan runcit barangan kesenian & rekreasi (1.1 peratus),” katanya.

Mengenai subsektor perdagangan borong, Mohd Uzir berkata, kenaikan 4.7 peratus tahun ke tahun pada bulan dikaji disokong oleh lain-lain pengkhususan jualan borong yang meningkat RM900 juta atau 4.0 peratus kepada RM24.1 bilion.

“Pertumbuhan tahun ke tahun sebanyak 10.5 peratus bagi subsektor kenderaan bermotor pada Mei dipacu oleh jualan kenderaan bermotor yang melonjak 11.1 peratus atau RM1 bilion untuk merekodkan RM9.9 bilion,” katanya.